

МЕСЯЦА ЯНВАРЯ В 6^{ый} ДЕНЬ.

**СВЯТОЕ БОГОЯВЛЕНИЕ ГОСПОДА БОГА
И СПАСА НАШЕГО ИИСУСА ХРИСТА**

При часе 5-м дне знаменует в великое, и потом во вся тяжкая. И собравшися во храм, начинаем Вечерню: и поем обычный псалом. Таже ектения великая.

И по ектении, аще будет в субботу, стихословим, Блажен муж: кафисму всю. Аще же в неделю, поем 1-й антифон.

Аще же во инья дни, стихология не бывает. Но абие поем, Господи, воззвах, на глас 2. Иерей же творит проскомидию. Диакон кадит церковь по обычаю. И мы поем:

Стихиры праздника на 8, глас 2.

[Самогласны Иоанна монаха:]

Просветителя нашего, / просвещающаго всякаго человека, / видев Предтеча крестится пришедша, / радуется душою, / и трепещет, рукою показывает Его, / и глаголет людем: / Сей избавляяй Израиля, свободяяй нас от истления. / О безгрешный Христе Боже наш, слава Тебе. [Дважды]

Избавителю нашему от раба крещаему, / и Духа пришествием свидетельствуему, / ужасошася зряще ангельская воинства. / Глас же с небесе принесеса от Отца: / Сей, Егоже Предтеча рукою крещает, / Сын Мой есть возлюбленный, / о Немже благоволих. / Христе Боже наш слава Тебе. [Дважды]

Иорданския струи Тебе источника прияша, / и Утешитель в виде голубине сходяше. / Приклоняет верх, Приклонивый небеса. / Зовет и вопиет брение Зиждительно: / что ми повелеваеши, яже выше мене? / Аз требую Твоего крещения. / О безгрешный Христе Боже наш, слава Тебе. [Дважды]

Спасти хотя заблудшаго человека, / не не сподобился еси в рабий зрак облещися, / подобаше бо Тебе Владыце и Богу воспряти наша за ны: / Тебе бо крещшуся плотию Избавителю, / оставления сподобил еси нас, темже вопием Ти: / Христе Боже наш, слава Тебе. [Дважды]

Слава, и ныне, глас тойже. [Византиево:]

Приклонил еси главу Предтечи, / сокрушил еси главы змиев: / пришел еси в струи, / просветил еси всяческая, / еже славити Тя, / Спасе, Просветителя душ наших.

Вход со Евангелием. Прокимен дне.

Бытия чтение. [Глава 1.]

В начале сотвори Бог небо и землю. Земля же бе невидима и неустроена, и тьма верху бездны: и Дух Божий ношашеса верху воды. И рече Бог: да будет свет, и бысть свет. И виде Бог свет, яко добро: и разлучи Бог между светом, и между

тьмою. И нарече Бог свет день, и тьму нарече ночь. И бысть вечер, и бысть утро, день един. И рече Бог: да будет твердь посреде воды, и да будет разлучающи посреде воды и воды: и бысть тако. И сотвори Бог твердь: и разлучи Бог между водою, яже бе под твердию, и между водою, яже бе над твердию. И нарече Бог твердь, небо: и виде Бог, яко добро. И бысть вечер, и бысть утро, день вторый. И рече Бог: да соберется вода, яже под небесем, в собрание едино, и да явится суша: и бысть тако. И собрася вода, яже под небесем в собрания своя, и явися суша. И нарече Бог сушу землю: и собрания вод нарече моря. И виде Бог, яко добро. И рече Бог: да прорастит земля былие травное, сеющее семя по роду и по подобию, и древо плодовитое творящее плод, емуже семя его в нем по роду на земли: и бысть тако. И изнесе земля былие травное, сеющее семя по роду и по подобию, и древо плодовитое творящее плод, емуже семя его в нем по роду на земли: и виде Бог, яко добро. И бысть вечер, и бысть утро, день третий.

Исхода чтение. [Глава 14.]

Рече Господь к Моисею: что вопиеш ко Мне? Глаголи сыном Израилевым, и да путешествуют. И ты возми жезл твой, и простири руку твою на море, и расторгни е, и да внидут сынове Израилевы посреде моря по суху. И се, Аз ожесточу сердце фараоново, и слуг его, и египтян всех, и внидут вслед их, и прославлюся в фараоне, и во всем воинстве его, и в колесницах, и в конех его. И уразумеют вси египтяне, яко Аз Господь, прославляющу Ми ся в фараоне, и в колесницах, и в конех его. Простре же Моисей руку на море, и возгна Господь море ветром южным сильным, всю ночь, и сотвори море сухо, и разступися вода. И внидоша сынове Израилевы в посред моря по суху: и вода им стена бысть одесную, и стена ошуюю. Погнаша же египтяне, и внидоша создади их, всяк конь фараонов, и колесницы, и всадницы, посреде моря. Простре же Моисей руку на море, и устроися вода ко дню на место: египтяне же бежаша под водою: и истрясе Господь египтяны посреде моря. И обратившися вода покры колесницы, и всадники, и тристаты, и всю силу фараонову, вшедших в след их в море, и не оста от них ни един. Сынове же Израилевы приидоша по суху посреде моря.

Исхода чтение. [Главы 15 и 16.]

Поят Моисей сыны Израилевы от моря Чермнаго, и веде тья в пустыню Сур: и идяху три дни в пустыни, и не обретаху воды, да быша пили. Приидоша же в Мерру, и не можаху пити воды из Мерры, горька бо бе: сего ради наречеса имя месту тому, Горечь. И роптаху людие на Моисеа, глаголюще: что прием? Возопи же Моисей ко Господу, и показа ему Господь древо: и вложе тое в воду, и сладка бысть вода. Тамо положи ему Бог оправдания и суды. И тамо искушаше его, и рече: Аще слухом услышиши глас Господа Бога твоего, и угодная пред Ним сотвориши, и внушиши заповеди Его, и сохраниши вся оправдания Его, всяку болезнь, юже наведох Египтяном, не наведу на тя: Аз бо есмь Господь исцеляяй тя. И приидоша во Елим, и бяху тамо дванадесять источников вод, и седьмдесят стеблей финиковых: и ополчишася тамо при водах. И воздвигошася от Елима, и прииде весь сонм сынов Израилевых в пустыню Син, яже есть между Елимом и между Синою.

Тропарь, глас 5:

Явился еси в міре, / Иже мір сотворивый, / да просветиши во тьме сидящия, /
Человеколюбче, слава Тебе.

Стих 1: Боже, ущедри ны и благослови ны: просвети лице Твое на ны и помилуй ны: познати на земли путь Твой, во всех языцех спасение Твое.

Да просветиши во тьме сидящия, / Человеколюбче, слава Тебе.

Стих 2: Да исповедятся Тебе людие, Боже, да исповедятся Тебе людие вси, да возвеселятся, и да возрадуются языцы, яко судиши людем правотою, и языки на земли наставиши.

Да просветиши во тьме сидящия, / Человеколюбче, слава Тебе.

Стих 3: Да исповедятся Тебе людие, Боже, да исповедятся Тебе людие вси: земля даде плод свой, благослови ны, Боже, Боже наш: благослови ны, Боже, и да убоятся Его вси концы земли.

Да просветиши во тьме сидящия, / Человеколюбче, слава Тебе.

Слава, и ныне:

Явился еси в міре, / Иже мір сотворивый, / да просветиши во тьме сидящия, /
Человеколюбче, слава Тебе.

Иисуса Навина чтение. [Глава 3.]

Рече Господь ко Иисусу: в день сей начинаю вознести тя пред всеми сынами Израилевыми, да разумеют, зане якоже бех с Моисеом, тако буду и с тобою. И ныне заповеждь священником взимающим ковчег завета, глаголя: да яко внидите в часть воды Иорданския, и станете при Иордане. Якоже идяху священницы взявшии ковчег завета Господня во Иордан: и ноги священников носящих ковчег омочишася в части воды Иорданския. Иордан же исполняшеся во всем ложи своем, якоже во дни жатвы пшеницы: И сташа воды низходящия свыше в сонм един, отстоящия далече зело от Адами града, даже до страны Кариафиарим: Низходящия же сниде на море Аравитское, даже до моря Солищнаго, дондеже вконец оскуде, и людие стояху прямо Иерихона. И сташа священницы взявшии ковчег завета Господня, на сусе посреде Иордана готовы. И вси сынове Израилевы преидоша по суху, дондеже скончаша вси людие преходяще Иордан.

Царств четвертых чтение. [Глава 2.]

Рече Илия к Елиссею: седи убо zde, яко Господь посла мя до Иордана. И рече Елисей: жив Господь, и жива душа твоя, аще оставлю тя. И поидоста оба, и пятьдесят мужей от сынов пророческих, приидоша стаща прямо издалеча, оба же стаста при Иордане. И прият Илия милоть свою, и свит ю, и порази ею воды, и разделися вода сюду и сюду, и преидоста оба по суху. И бысть яко преидоста, и рече Илия Елиссею: что сотворю тебе, прежде даже не взял буду от тебе. И рече Елисей: да будет убо дух иже в тебе, сугуб во мне. И рече Илия: ожесточил еси просити, обаче аще увидиши мя вземлема от тебе, будет ти тако: аще ли же не увидиши, не будет. И бысть идущим им, и глаголющим, и се колесница огненна,

и кони огненни, и раздели между обема: и взятся Илия трусом, яко на небо. И Елисей зряше, и той вопияше: отче, отче, колесница Израилева, и кони его, и не виде его ктому. И ятсся Елисей за ризы своя, и раздра я на двое, и взят милоть Илиину падшую верху его. И обратися Елисей, и ста на брезе Иордана. И прият Елисей милоть Илиину падшую верху его, и удари воды, и не разделишася. И рече Елисей: где убо есть Бог Илиин Аффо? И удари Елисей воды второе, и разделишася воды, и преиде по суху.

Царств четвертых чтение. [Глава 5.]

Прииде Нееман, князь царя Ассирийскаго, с колесницами и коньми своими, и ста при дверех храма Елисеева. И посла Елисей к нему вестника, глаголя: шед измыйся во Иордане седмжды, и обратится плоть твоя к тебе, и очистишися. И разгневался Нееман, и отыде, и рече: се рех, да изыдет ко мне, и призовет о имени Господа Бога своего, и положит руку свою на проказу, и отымет ю от плоти моея. Не добрейши ли суть Арвана и Фарфа, рецы Дамасковы, паче Иордана и всех вод Израилевых? Не шед ли измыюся в них, и очишуся? И возвратися, и отыде с гневом. И приступиша отроцы его и реша к нему: господи, аще бы велие слово глаголал к тебе пророк, не бы ли сотворил, якоже рече к тебе: измыйся и очистишися? И сниде Нееман, и погрузися во Иордане седмжды, по глаголу человека Божия, и обратися плоть его к нему яко отрочате мала, и очистися.

Тропарь, глас 6:

Грешником и мытарем / за множество милости Твоя явился еси, Спасе наш: / где бо имел бы свет Твой возсияти, / токмо на сидящия во тьме, слава Тебе.

Стих 1: Господь воцарися, в лепоту облечеса: облечеса Господь в силу и препоясася. Ибо утверди вселенную, яже не подвижится. Готов престол Твой отголе, от века Ты еси.

Где бо имел бы свет Твой возсияти, / токмо на сидящия во тьме, слава Тебе.

Стих 2: Воздвигоша реки, Господи, воздвигоша реки гласы своя. Возмут реки сотрения своя от гласов вод многих.

Где бо имел бы свет Твой возсияти, / токмо на сидящия во тьме, слава Тебе.

Стих 3: Дивны высоты морския, дивен в высоких Господь: свидения Твоя уверишася зело. Дому Твоему подобает святыня, Господи, в долготу дней.

Где бо имел бы свет Твой возсияти, / токмо на сидящия во тьме, слава Тебе.

Слава, и ныне:

Грешником и мытарем / за множество милости Твоя явился еси, Спасе наш: / где бо имел бы свет Твой возсияти, / токмо на сидящия во тьме, слава Тебе.

Пророчества Исаина чтение. [Глава 1.]

Тако глаголет Господь: измыйтеся, и чисти будете, отымите лукавствия от душ ваших пред очима Моима: престаните от лукавствий ваших. Научитесь доброе творити, изыщите суда, избавите обидима, судите сиру, и оправдате вдовицу. И приидите, и истяжимся, глаголет Господь: и аще будут греси ваши яко

багряное, яко снег убелю: аще же будут яко червленое, яко волну убелю. И аще хотите, и послушаете Мене, благая земли снесите. Аще ли же не хотите, ниже послушаете Мене, меч вы пояст: уста бо Господня глаголаша сия.

Бытия чтение. [Глава 32.]

Возрев Иаков, и виде полк Божий, ополчившийся, и сretoша его ангели Божии. Рече же Иаков, егда виде их: полк Божий сей. И нарече имя месту тому Полки. Посла же Иаков вестники пред собою ко Исаву брату своему в землю Сиир, во страну едомскую. И заповеда им глаголя: сице рцйте господину моему Исаву: Тако глаголет отрок твой Иаков: с Лаваном пожих, и укусных до ныне: и быша ми овцы и волове, и ослята, и рабы и рабыни. И послах возвестити господеву моему Исавову, да обрящет благодать отрок твой пред тобою. И возвратишася вестницы ко Иакову, глаголюще: идохом ко Исаву брату твоему, и се сам грядет в сретение твое, и четыре ста мужей с ним. Убося же Иаков зело, и недоумевашеся, и раздели люди иже с ним, и волы и овцы на два полка. И рече Иаков: аще приидет Исав на полк един, и посечет и, будет полк второй во спасение. И рече Иаков: Бог отца моего Авраама и Бог отца моего Исаака, Господи рекый ми: отбежи в землю бытия твоего, и добро ти сотворю. Довольно ми да будет от всякия правды, и от всякия истины, юже сотворил еси отроку Твоему: с жезлом бо моим сим преидох Иордан.

Исхода чтение. [Глава 2.]

Сниде дщи фараонова измытиса на реку, и рабыни ея прехождаху при реце: и видевши крабийцу в лучице, пославши рабыню, взята ю. Отверзши же видит отроча плачущееся в крабийце, и пощаде е дщи фараонова, и рече: от детей еврейских сие. И рече сестра его дщери фараонове: хошеши ли призову ти жену питательницу от еврей, и воздоит ти отроча? И рече ей дщи фараонова: иди. Шедши же отроковица, призва мать отрочате. Рече же к ней дщи фараонова: соблюди ми отроча сие, и воздой ми е: аз же дам ти мзду. Приемше же жена отроча, и дояше е. Устрабившуся же отрочати, введе е ко дщери фараонове, и бысть ей в сына. Именована же имя ему Моисей, глаголющи: от воды взях его.

Судей чтение. [Глава 6.]

Рече Гедеон к Богу: аще спасаеши рукою моею Израиля, имже образом рекл еси: Се аз положу руно овчье на гумне. И аще будет роса на руно токмо, по всей же земли суша, разумею, яко спасеши рукою моею Израиля, имже образом рекл еси: и бысть тако. И уранив Гедеон наутрие, и исцеди руно, и истече роса от руна, исполнен окрин воды. И рече Гедеон к Богу: да не прогневается убо ярость Твоя на мя, и возглаголю еще единою, и искушу еще единою руном. Да будет убо суша на руно токмо, по всей же земли роса. И сотвори Бог тако в нощи той, и бысть суша на руно токмо, по всей же земли бысть роса.

Царств третьих чтение. [Глава 18.]

Рече Илиа к людям: приступите ко мне, и приступиша вси людие к нему. И взяли Илиа дванадесять камней, по числу дванадесяти колен сынов Израилевых, якоже глагола Господь к нему глаголяй: Израиль будет имя твое. И созда

камение, и исцели олтарь Господень раскопанный, и сотвори ров, вмещающ по две меры семени, окрест олтаря. И положи полена на олтари, егоже сотвори. И раздроби всесожжения, и положи на полена, и обыде олтарь. И рече Илия: примите ми четыре водоносы воды, и да пролиются на олтарь, на всесожжение же и на полена. И рече: удвойте, и удвоиша. И рече: утройте, и утроиша. И идяше вода окрест олтаря, и ров исполнися воды. И возопи Илия на небо, и рече: Господи Боже Авраамов и Исааков и Иаковль, услыши мене днесь огнем: и разумеют вси людие сии, яко Ты еси един Господь Бог Израилев, и аз раб Твой, и Тебе ради сотворих сия вся, и Ты обрати сердца людей сих в след Тебе. И паде огонь от Господа с небесе, и пояде всесожжения, и полена и воду, яже на них, и воду, яже в рове, и камение, и персть полиза огонь. И падоша вси людие на лице своем, и реща: воистину Господь Бог, Той есть Бог.

Царств четвертых чтение. [Глава 2.]

Рекоша мужие града Иерихонска ко Елиссею: се жилище града сего добро, якоже ты господи видиши, и воды злы и безчадны. И рече Елисей: примите ми водонос нов, и всыплите ту соль: и прияша и. И изыде на исхождение вод, и вверже тамо соль, и рече: тако глаголет Господь, исцелих воды сия, и не кому будет отнюд умирая, ниже безчадствующая сими. И исцелеша воды до дне сего, по глаголу, иже глагола Елисей.

Пророчества Исаиина чтение: [Глава 49.]

Тако глаголет Господь: во время приятное послушах тя, и в день спасения помогах тебе, и создах тя, и дах тя в завет языков, еже устроить землю, и наследити наследие пустыни, глаголюща сущим во узах: изыдите: и сущим во тьме, открыйтеся. На всех путех пастися будут, и на всех стезях пажить их. Не взалчут, ниже вжаждут, ниже поразит их зной, ниже солнце: но милуяй их утешит я, и сквозе источники вод проведет я. И положу всякую гору в путь, и всякую стезю в паству их. Се сии издалеча приидут, сии от севера и моря, инии же от земли Персская. Да веселятся небеса, и радуется земля: да отрыгнут горы веселие, и холми правду, яко помилова Бог люди Своя, и смиренныя людей утешит. Рече же Сион: остави мя Господь, и Бог забы мя. Еда забудет жена отроча свое? или не помилует изчадия чрева своего? Аще ли же и сих забудет жена, но Аз не забуду тебе, глаголет Господь.

Ектения: Паки и паки:

Возглас: Яко Свят еси, Боже наш:

Таже прокимен, глас 3:

Прокимен: Господь просвещение мое и Спаситель мой, * кого убоюся?

Стих: Господь защититель живота моего, от кого утрашуся?

Апостол Коринфяном, зачало 143. [1 Кор. 9, 19 – 27.]

Братѣѣ: Свободенъ бо сый ꙗко всѣхъ, всѣмъ себѣ порабѣтихъ, да множайшыя приверѣщю: выхъ ѡдѣемъ ꙗко ѡдѣи, да ѡдѣи прѣверѣщю: подзакѣнныи ꙗко

подзаконенъ, да подзаконныа пришеврѣцѣ: беззаконныи ѿкъ беззаконенъ, не сый беззаконникъ бѣ, но законникъ хрѣтѣ, да пришеврѣцѣ беззаконныа. **Б**ыхъ немощныи ѿкъ немошенъ, да немощныа прѣшеврѣцѣ. **В**сѣмъ быхъ всѣ, да всѣкъ нѣкѣа спасѣ. **С**іе же творю за бѣговѣстїе, да собщникъ емѣ вѣдѣ. **Н**е вѣстѣе ли, ѿкъ текѣщїи въ позорици вси оубо текѣтъ, единый же прїемлетъ почестъ; **Т**ѣкъ тецыте, да постигнете. **В**сѣкъ же подвижайса ѿ всѣхъ воздержитса: и онѣ оубо да истѣненъ вѣнецъ прїимѣтъ, мы же неистѣненъ. **А**зъ оубо тѣкъ, не ѿкъ безвѣстнѣ, тѣкъ подвижаюса, не ѿкъ воздѣхъ бѣи: но оумерщвлѣю тѣло мое и поравоцаю, да не кѣкъ, иныи проповѣдѣа, самъ неключиимъ вѣдѣ.

Аллилуиа, глас 6: Отрыгну сердце мое слово благо:

Стих: Красен добротою паче сынов человеческих.

Евангелие Луки, зачало 9. [Лк. 3, 1 – 18.]

Въ пѣтое же надесятѣ лѣто владычества тиверїа кесарѣа, овладающѣ понтїйскомѣ пѣлатѣ идѣею, и четвертовластвѣющѣ галїлѣею ирѣдѣ, фѣлиппѣ же братѣ егѣ четвертовластвѣющѣ итѣреею и трахонїтскою странѣю, и лѣсанїю авѣлиниѣю четвертовластвѣющѣ, при архїерѣн аннѣ и каїафѣ, вѣстѣ гѣголѣ вѣїи ко іѣаннѣ захарїинѣ сынѣ въ пѣстыни. **И** прїидѣ во всю странѣ іорданскѣю, проповѣдаа крѣщенїе поканїа во овставленїе грѣхѣвъ: ѿкоже естѣ писано въ книзѣ словесѣ исѣи прѣрѣка, глаголюща: гласъ вопїющагѣ въ пѣстыни: оуготовайте пѣтъ гдѣень: прѣавы творите стезѣ егѣ: всѣка дѣбрь исполнитса, и всѣка гора и холмѣ смиритса: и вѣдѣтъ стрѣпштанѣ въ прѣваа, и острѣи въ пѣти глѣдки: и оузритѣ всѣка плѣтъ спнїе вѣїе. **Г**лаголаше же исходѣщымъ народѣмъ крестїтиса ѿ негѣ: порождѣнїа ехїданѣва, ктѣ сказа вамѣ вѣжѣти ѿ градѣцагѣ гнѣва; **С**отворите оубо плоды достѣйны поканїа: и не начинайте глаголати въ себѣ: оtcѣа и мамы авраїма: глаголю во вамѣ, ѿкъ мѣжетъ вѣтъ ѿ каменїа сегѣ воздвїгнѣти чѣда авраїмѣ. **О**убо же во и сѣкїра при корѣни дрѣва лежїтъ: всѣко оубо дрѣво не творѣщее плодѣа доврѣа постѣкаѣтса и во огнѣ вметѣетса. **И** вопрошахъ егѣ народѣи, глаголюще: чтѣ оубо сотворимъ; **ѿ**вѣщаавъ же глагола имъ: имѣай двѣ рїзѣ, да подастѣ неимѣщымъ: и имѣай брашна, тѣкожде да творїтъ. **П**рїидѣша же и мытарїи крестїтиса ѿ негѣ и рѣша къ немѣ: оучїтелю, чтѣ сотворимъ; **О**нъ же речѣ къ нимъ: ничтѣже болѣе ѿ повелѣннагѣ

вѣмъ творите. **В**опрошахъ же его и воини, глаголюще: и мы что сотворимъ; **И** рече къ нимъ: ни когѣже ѡбидите, ни ѡклеветавайте: и доволни вѣдите ѡбръки вашии. **Ч**аючимъ же людемъ, и помышляющимъ всѣмъ въ сердцахъ своихъ ѡ іоаннѣ, еда тѣи есть христосъ, ѡвѣщаваше іоаннъ всѣмъ, глагола: азъ ѡубо водою крещая вы: грядетъ же крѣпий мене, емже нѣсмь достоинъ ѡрѣшити ремѣнь сапогъ его: тѣи вы крѣтитъ дѣломъ стѣмъ и огнемъ: емже лопата въ рѣкѣ его, и ѡтребитъ глинѣ свое, и соверетъ пшеницѣ въ житницѣ свои, плѣвы же сожетъ огнемъ негасяющимъ. **М**нога же ѡубо и ѣна ѡтѣшамъ бѣговѣствоваша людемъ.

И порядку Божественная литургия Великаго Василиа.

Вместо Достойно поем: О Тебе радуется:

Причастен: Хвалите Господа с небес:

И по заамвонной молитве, абие исходимъ вси ко священной купели в притвор, или на источники, Царскими врата: Игумен, или старейший иерей, нося на главе честный Крест, предыдущимъ ему свещеносцемъ и диакономъ с кадилы. И полагаетъ честный Крестъ на благоукрашенномъ столѣ, идеже и воде уготованней в чашѣ, и свещамъ окрестъ стоящимъ: и даются свещи братьямъ. И настоятель кадитъ окрестъ стола, таже образы, и праздника на аналогии, и священниковъ, и лики по чину, предходящу ему диакону со свещею, клирикомъ же поющимъ тропари сия:

Глас 8:

Глас Господень на водахъ вопиетъ, глаголя: / приидите, примите вси Духа премудрости, / Духа разума, Духа страха Божия, / являшагося Христа. [Трижды]

Днесъ водъ освящается естество, / и разделяется Иорданъ, / и своихъ водъ возвращаетъ струи Владыку / зря крещаему. [Дважды]

Яко Человекъ на реку пришелъ еси, Христе Царю, / и рабское крещения пріяти тщишися, Блаже, / отъ Предтечеву руку, / грехъ ради нашихъ, / Человеколюбче. [Дважды]

Слава, и ныне, гласъ тойже:

Ко гласу вопиющаго в пустыни, / уготовайте путь Господень. / Пришелъ еси, Господи, / зракъ рабий пріимъ, крещения прося, / не ведый греха: / видеша Тя воды и убояшася. / Трепетенъ бысть Предтеча, и возопи глаголя: / како просветитъ светильникъ Света? / Какъ руку положитъ рабъ на Владыку? / Освяти мене и воды, Спасе, вземляй міра грехъ.

Пророчества Исаиина чтение: [Глава 35.]

Тако глаголетъ Господь: да возвеселится пустыня жаждающая, да возрадуется пустыня, и процвететъ яко кринъ, и да прозябнетъ, и вся возвеселятся. И возрадуются

пустынная Иорданова, и слава Ливанова дана бысть ей, и честь Кармилова, и людие Мои узрят славу Господню, и высоту Божию. Укрепитеся руки ослабленные, и колена разслабленная утешитеся. И рцыте малодушным мыслию, укрепитеся и не бойтеся: се Бог наш суд воздает, Той приидет и спасет нас. Тогда отверзутся очеса слепых, и ушеса глухих услышат: Тогда скочит хромый яко елень, и ясен будет язык гугнивых: яко проразися в пустыни вода, и дებрь в земли жаждущей. И будет безводная в блата, и в жаждущей земли источник воды будет: тамо будет веселие птиц, водворение сиринов, и тростий, и блата. Тамо будет путь чист, и путь свят наречется: и не мимоидет тамо нечист, ниже будет тамо путь нечистый, рассеянии же пойдут по нему, и не заблудят. И не будет тамо льва, ниже зверей лютых взыдет нань, ниже обрящется тамо: но пойдут по нему избавлении и собраннии от Господа. И обратятся, и приидут в Сион с веселием и радостию, и веселие вечное над главою их. Хвала и радование, и веселие постигнет их: отбеже болезнь, печаль и воздыхание.

Пророчества Исаина чтение: [Глава 55.]

Тако глаголет Господь: жаждущии на воду идите, и елицы не имате сребра, шедше купите, и ядите и пейте, без сребра и цены, вино и тук. Вскую цените сребро не в хлебы, и труд ваш не в сытость? Послушайте Мене, и снесите благая, и насладитесь во благих душа ваша. Внимайте ушима вашима, и последуйте путем Моим: услышите Мене, и жива будет во благих душа ваша. И завещаю вам завет вечен, преподобная Давидова верная. Се свидетельство во языцех, дах Его князя, и повелителя во языцех. Се языцы, иже не ведяху тя, призовут тя, и людие, иже не познаша тя, к тебе прибегнут, ради Господа твоего, и Святаго Израилева, яко прославих тя. Взыщите Бога, и вневгда вам обрести Его, призовите. Егда же аще приблизится вам, да оставит нечестивый пути своя, и муж беззаконный советы своя: и обратитесь ко Господу Богу вашему, и помиловани будете, яко помногу оставит грехи ваша. Не суть бо совети Мои, якоже совети ваши: ниже якоже путие ваши, путие Мои, глаголет Господь. Но якоже отстоит небо от земли, тако отстоит путь Мой от путей ваших, и размышления ваша от мысли Моея. Якоже бо аще снидет дождь, или снег с небесе, и не возвратится оттуду, дондеже упоит землю, и родит и прозябнет, и даст семя сеющему, и хлеб в съедь: Тако будет глагол Мой, иже аще изыдет из уст Моих, и не обратится ко Мне тощь, дондеже аще скончает вся, елика восхотех, и поспешу пути Моя, и повеления Моя. Веселием бо изыдите, и радостию научитесь: горы бо и холми скочат ждуще вас в радости, и вся дрeвеса сельная восплещут ветвьми. И вместо драчия взыдет кипарис, вместо же кропивы взыдет мирсина. И будет Господь во имя, и в знамение вечное, и не оскудеет.

Пророчества Исаина чтение: [Глава 12.]

Тако глаголет Господь: почерпите воду с веселием от источник спасения. И речеши в день он: исповедайтеся Господеви, и призовите имя Его, возвестите во языцех славу Его: помяните, яко вознесся имя Его. Пойте имя Господне, яко высокая сотвори: возвестите сия по всей земли. Радуйтеся и веселитесь живущии в Сионе, яко вознесся Святыи Израилев посреде его.

Прокимен, глас 3:

Прокимен: Господь просвещение мое, и Спаситель мой, кого убоюся?

Стих: Господь Защититель живота моего, от кого утрашуся?

Апостол к Коринфяном, зачало 143 от полу. [1 Кор. 10, 1 – 4.]

Братие, не хощу вас не ведети, яко отцы наши вси под облаком быша, и вси сквозе море проидоша: **И** вси в **М**ойсеа крестишася во облаце и в мори: **И** вси тожде брашно духовное ядоша: **И** вси тожде пиво духовное пиша, пиаху бо от духовнаго последующаго камене: камень же бе **Х**ристос.

Аллилуиа, глас 4: Глас Господень на водах:

Стих: Бог славы возгреме, Господь на водах многих.

Евангелие от Марка, зачало 2 [Мк. 1, 9 – 11.]

И бысть во днехъ оныхъ, прїиде їисъ ѿ назарѣта галилейскаго и крѣтиса ѿ іоанна во іорданѣ. **И** ѿбѣе восходѣ ѿ воды, видѣ разводѣшася небеса и дѣа ѿкво гóлбѣа, сходѣша на нь. **И** гласть бысть съ небесе: ты єси снъ мой возлюбленный, ѿ немиже благоволихъ.

Диакон же глаголет ектению:

Миром Господу помолимся.

О свышнем мире:

О мире всего міра:

О святем храме сем:

О великом господине и отце нашем:

О граде сем:

О благорастворении воздухон:

О плавающих, путешествующих:

О еже освятитися водам сим, силою и действием, и наитием Святаго Духа, Господу помолимся.

О еже снизходити на воды сия, очистительному Пресущныа Троицы действию, Господу помолимся.

О еже дароватися им благодати избавления, благословению Иорданову, силою и действием, и наитием Святаго Духа, Господу помолимся.

О еже сокрушится сатане под ногами нашими вскоре, и разорится всякому совету лукавому, движимому на ны, Господу помолимся.

Яко да Господь Бог измет нас от всякаго навета, и искушения сопротивника, и достойны соделает обещанных благ, Господу помолимся.

О еже просветитися нам просвещением разума и благочестия, наитием Святаго Духа, Господу помолимся.

О еже низпослати Господу Богу благословение Иорданово, и освятити воды сия, Господу помолимся.

О еже быти воде сей, освящения дару, грехов избавлению, во исцеление души и тела, и на всякую пользу изрядную, Господу помолимся.

О еже быти воде сей приводящей в жизнь вечную, Господу помолимся.

О еже явится сей отгнанию всякаго навета, видимых и невидимых враг, Господу помолимся.

О черплющих и емлющих во освящение домов, Господу помолимся.

О еже быти сей во очищение душ и телес, всем верою и черплющим же и причащающимся от нея, Господу помолимся.

О еже сподобитися нам исполниться освящения вод сих причащением, невидимым явлением Святаго Духа, Господу помолимся.

О еже услышати Господу Богу глас моления нас грешных и помиловати нас, Господу помолимся.

О избавитися нам от всякия скорби: **Заступи, спаси, помилуй: Пресвятую, Пречистую, Преблагословенную:**

Сим глаголемым, священник тайно молитву сию глаголет:

Господи Иисусе Христе, Единородный Сыне, сый в недре Отчи, Истинный Боже, Источниче жизни и безсмертия, Свете от Света, пришедый в мир, еже просветити его, озари нашу мысль Святым Твоим Духом, и приими нас величество и благодарение Тебе приносящих, о яже от века дивных Твоих великодействиих, и еже в последния веки спасительном Твоем смотреии, в немже в наше немощное и нищее одеявша смещение, и работным мерам снизшедый, Иже всех Царю. Еще и рабскою рукою во Иордане креститися претерпел еси, да водное естество освятив, Безгрешне, путесотвориши нам, еже водою и Духом паки рождение, и к первому нас устроиши свободждению: егоже Божественнаго таинства воспоминание празднующе, молимся Тебе, Владыко Человеколюбче, воскропи и на ны недостойныя рабы Твоя, по Божественному Твоему обещанию, воду чисту, Твоего благоутробия дар, во еже над водою сею прошению нас грешных, благоприятну быти Твоею благостию, и благословению Твоему ею, нам же и всем верным людем Твоим дароватися, в славу святаго и покланяемаго Твоего Имене. Яко подобает Тебе всякая слава, честь и поклонение, со Безначальным Твоим Отцем, и Пресвятым и Благим, и Животворящим Твоим Духом ныне, и присно, и во веки веков.

И рек в себе: Аминь.

Диакону же исполнившу ектению, начинает священник велегласно молитву сию:

Велий еси, Господи, и чудна дела Твоя, и неединоже слово довольно будет к пению чудес Твоих. [Трижды]

Ты бо хотением от не сущих во еже быти приведый всяческая, Твоею державою содержиши тварь и Твоим промыслом строиши мир. Ты от четырех стихий тварь сочинивый, четырьмя временими круг лета венчал еси. Тебе трепещут умныя вся силы: Тебе поет солнце, Тебе славит луна, Тебе присутствуют звезды: Тебе слушает свет, Тебе трепещут бездны, Тебе работают источники. Ты простерл еси небо яко кожу: Ты утвердил еси землю на водах: Ты оградил еси море песком: Ты яко отдыханием воздух пролиал еси. Ангельския силы Тебе служат, архангельстии лица Тебе кланяются: многоочитии херувими, и шестокрилатии серафими, окрест стояще, и облетающе, страхом неприступныя славы Твоя покрываются. Ты бо Бог сый Неописанный, Безначальный же и Неизглаголаный, пришел еси на землю, зрак раба прием, в подобии человечеством быв: не бо терпел еси, Владыко, милосердия ради милости Твоя, зрети от диавола мучима рода человека, но пришел еси и спасл еси нас. Исповедуем благодать, проповедуем милость, не таим благодеяния: естество нашего рода свободил еси. Девственную освятил еси утробу Рождеством Твоим: вся тварь воспевает Тя явльшагося. Ты бо Бог наш на земли явился еси, и с человеки пожил еси: Ты Иорданския струи освятил еси, с небесе низпославый Святаго Твоего Духа, и главы тамо гнездящихся сокрушил еси змиев.

И сие убо священник глаголя трижды, и воду рукою благословляет на кийждо стих:

Ты убо, Человеколюбче Царю, прииди и ныне наитием Святаго Твоего Духа, и освяти воду сию. [Трижды]

И даждь ей благодать избавления, благословение Иорданово: Сотвори ю нетления источник, освящения дар, грехов разрешение, недугов исцеление, демонов всегубительство, сопротивным силам неприступную, ангельския крепости исполненную: Да вси почерпающи и причащающиися, имеют ю ко очищению душ и телес, ко исцелению страстей, ко освящению домов, и ко всякой пользе изрядну. Ты бо еси Бог наш, Иже водою и Духом обновивый обетшавшее грехом естество наше: Ты еси Бог наш, водою потопивый при Ное грех. Ты еси Бог наш, Иже морем свободивый от работы фараона Моисеом род Еврейский. Ты бо еси Бог наш, разразивый камень в пустыни, и потекоша воды, и потоцы наводнишася, и жаждущия люди Твоя насытивый. Ты еси Бог наш, Иже водою и огнем пременивый Илиею Израиля от прелести Вааловы.

Сам и ныне, Владыко, освяти воду сию Духом Твоим Святым. [Трижды]

Даждь же всем прикасающимся ей, и причащающимся, и мажущимся ею, освящение, здравие, очищение и благословение.

Спаси Господи, и помилуй великаго господина и отца нашего, Святейшаго Патриарха Алексия, и господина нашего, Преосвященнейшаго Епископа [имярек], и сохрани их под кровом Твоим в мире, покори им всякаго врага и супостата. Даруй им вся, яже ко спасению прошения, и жизнь вечную: да и

стихиями, и человеки, и ангелы, и видимыми, и невидимыми, славится Твое пресвятое Имя, со Отцем и Святым Духом, ныне и присно, и во веки веков, аминь.

Священник: Мир всем.

Диакон: Главы ваша Господеви приклоните.

Священник преклонясь молится тайно:

Приклони Господи ухо Твое, и услыши ны, Иже во Иордане креститися изволивый, и освятивый воды, благослови всех нас, иже приклонением своея выи, назнаменующих работное воображение: и сподоби нас исполниться освящения Твоего, причащением воды сея, и да будет нам Господи, во здравие души и тела.

Возгласение: Ты бо еси освящение наше, и Тебе славу и благодарение и поклонение возсылаем, со Безначальным Твоим Отцем, и Пресвятым, и Благим, и Животворящим Твоим Духом, ныне и присно, и во веки веков, аминь.

И абие благословляя воду крестовидно честным Крестом, погружает его право, низводя в воду и возводя, держа его обема рукама, поя настоящий тропарь, во глас первый:

Во Иордане крещающуся Тебе Господи, / Троическое явися поклонение: / Родителей бо глас свидетельствоваше Тебе, / возлюбленнаго Тя Сына именуя: / и Дух в виде голубине, / извествоваше словесе утверждение, / явлейся Христе Боже, / и мир просвещей слава Тебе.

И в другой такожде Крестом знаменует воду, и в третий такожде, тойже тропарь поя сам настоятель, спующим ему и прочим священником: таже поют и лики тойже тропарь. Настоятель же возьмет священную воду на блюдо, и обратясь на запад лицом, в левой руке держа честный Крест, а в правой василки, кропит крестообразно на вся страны. И приходят прежде к настоятелю священницы, два два, и целуют честный Крест, и знаменует их василком по лицу со священною водою крестообразно, по тому же чину и вся братия. Поется же тогда тропарь от всех многожды, дондеже освятятся вся братия водным кроплением, и причащением. И абие входим во храм, и поем стихиру.

Слава, и ныне, глас 6:

Воспоим, вернии, / еже о нас Божия благодеяния величество: / о нашем бо прегрешении быв Человек, / нашим очищением очищается во Иордане: / Един Чистый и Нетленный, / освящай мене и воды, / и главы змиев сокрушай в воде. / Почерпем убо воду с веселием братие: / благодать бо Духа / верно почерпающим / невидимо подается от Христа Бога, / и Спаса душ наших.

Таже, Буди имя Господне благословено от ныне и до века. [Трижды]

И псалом 33:

Благословлю Господа на всякое время, / выну хвала Его во устех моих. / О Господе похвалится душа моя, / да услышат кротцыи, и возвеселятся. / Возвеличите Господа со мною, / и вознесем имя Его вкупе. Взысках Господа, и услыша мя, / и от всех скорбей моих избави мя. / Приступите к Нему, и просветитесь, / и лица ваша не постыдятся. / Сей нищий воззва, и Господь услыша и, / и от всех скорбей его спасе и. / Ополчится ангел Господень окрест боящихся Его, / и избавит их. / Вкусите и видите, яко благ Господь: / блажен муж, иже уповает на Нань. / Бойтесь Господа вси святии Его, / яко несть лишения боящимся Его. / Богатии обнищаша и взалкаша: / взыскающии же Господа не лишатся всякаго блага. / Приидите, чада, послушайте мене, / страху Господню научу вас. / Кто есть человек хотяй живот, / любяй дни видети благи? / Удержи язык твой от зла, / и устне твои, еже не глаголати лъсти. / Уклонися от зла, и сотвори благо: / взыщи мира, и пожени и. / Очи Господни на праведныя, / и уши Его в молитву их. / Лице же Господне на творящия злая, / еже потребити от земли память их. / Возваша праведнии, и Господь услыша их, / и от всех скорбей их избави их. / Близ Господь сокрушенных сердцем, / и смиренныя духом спасет. / Многи скорби праведным: / и от всех их избавит я Господь. / Хранит Господь вся кости их, / ни едина от них сокрушится. / Смерть грешников люта, / и ненавидящии праведнаго прегрешат. / Избавит Господь души раб Своих, / и не прегрешат вси уповающии на Него.

И дается антидор от иереа, и отпуст.

По отпусте, или есть литургия, или несть, поставляется свещник среди церкви: клирицы же, ставше оба лика вкупе, поют тропарь праздника: Слава, и ныне, кондак.

По скончании же кондака многолетствуют Патриарха, и Архиеереа, и настоятеля.

И входим в трапезу, и ядим с древномаслием: испиваем же и вина. Сыра же и подобных ему, и рыб, никакоже дерзнем ясти, возбранено бо есть божественными правилами. Сице бывает служба постному дню сушу, в Навечерие Просвещения.

ВЕДАТИ ПОДОБАЕТ, ЯКО ПРАЗДНИК СВЯТЫХ БОГОЯВЛЕНИЙ В КИЙЛЮБО ДЕНЬ СЛУЧИТСЯ, ПОЕМ ПОВЕЧЕРИЕ ВЕЛИКОЕ СИЦЕ:

О часе 10-м ноци бывает благовест, и потом трезвон во вся кампаны. Иерей же со диаконом облекшеся творят начало, якоже во вся праздники Владычни. Диакон глаголет: **Благослови, владыко. Иерей: Благословен Бог наш: и кадящу иерею, глаголем Повечерие великое от начала:**

Слава Тебе Боже наш, слава Тебе.

Царю Небесный:

Трисвятое, и прочее.

Господи помилуй, 12. Слава, и ныне:

Приидите поклонимся: трижды.

Псалом 4:

Внегда призвати ми, услыша мя Бог правды моя: в скорби распространил мя еси. ущебри мя, и услыши молитву мою. Сынове человечести, доколе тяжкосердии? вскую любите суету, и ищите лжи? И уведите, яко удиви Господь преподобнаго Своего: Господь услышит мя, внегда воззвати ми к Нему. Гневайтесь, и не согрешайте: яже глаголете в сердцах ваших, на ложах ваших умилитесь. Пожрите жертву правды, и уповайте на Господа. Мнози глаголют: кто явит нам благая? знаменася на нас свет лица Твоего, Господи. Дал еси веселие в сердце моем, от плода пшеницы, вина и елеа своего умножишася. В мире вкупе усну и почию: яко Ты Господи, единаго на уповании вселил мя еси.

Псалом 6:

Господи, да не яростию Твоею обличиши мене, ниже гневом Твоим накажеши мене. Помилуй мя Господи, яко немощен есмь: исцели мя Господи, яко смятошася кости моя. И душа моя смятется зело: и Ты Господи, доколе? обратися Господи, избави душу мою, спаси мя ради милости Твоея: яко несть в смерти поминаяй Тебе, во аде же кто исповестся Тебе? Утрудихся воздыханием моим, измыю на всяку ночь ложе мое, слезами моими постелю мою омочу. Смятется от ярости око мое, обетшах во всех вразех моих. Отступите от мене вси делающие беззаконие, яко услыша Господь глас плача моего. Услыша Господь моление мое, Господь молитву мою прият. Да постыдятся, и смятутся вси врази мои: да возвратятся, и устыдятся зело вскоре.

Псалом 12:

Доколе, Господи, забудеши мя до конца? Доколе отвращаеши лице Твое от мене? Доколе положу советы в души моей, болезни в сердце моем день и ночь? Доколе вознесется враг мой на мя? Призри, услыши мя Господи Боже мой, просвети очи мои, да не когда усну в смерть. Да не когда речет враг мой: укрепихся на него. Стужающий ми возрадуются, аще подвижуся. Аз же на милость Твою уповах: возрадуется сердце мое о спасении Твоем. Воспою Господеви благодеявшему мне, и пою имени Господа Вышняго. Призри, услыши

мя Господи Боже мой, просвети очи мои, да не когда усну в смерть: Да не когда речет враг мой: укрепихся на него.

Слава, и ныне: Аллилуиа, аллилуиа, аллилуиа, слава Тебе Боже. Трижды.

Господи помилуй, трижды.

Слава и ныне:

Псалом 24:

К Тебе Господи, воздвигох душу мою, Боже мой на Тя уповах, да не постыжуся во век, ниже да посмеют ми ся врази мои: Ибо вси терпящии Тя, не постыдятся. Да постыдятся беззаконующии вотще. Пути Твоя Господи, скажи ми, и стезям Твоим научи мя. Настави мя на истину Твою, и научи мя: яко Ты еси Бог Спас мой, и Тебе терпех весь день. Помяни щедроты Твоя Господи, и милости Твоя, яко от века суть. Грех юности моея, и неведения моего не помяни, по милости Твоей помяни мя Ты, ради благодати Твоея Господи. Благ и прав Господь, сего ради законоположит согрешающим на пути. Наставит кроткия на суд, научит кроткия путем Своим. Все путие Господни милость и истина, взыскающим завета Его и свидения Его. Ради Имене Твоего Господи, и очисти грех мой, мног бо есть. Кто есть человек бояйся Господа? Законоположит ему на пути, егоже изволи. Душа его во благих водворится, и семя его наследит землю. Держава Господь боящихся его, и завет Его явит им. Очи мои выну ко Господу, яко Той исторгнет от сети нозе мои. Призри на мя, и помилуй мя, яко единород и нищ есмь аз. Скорби сердца моего умножишася, от нужд моих изведи мя. Виждь смирение мое и труд мой, и остави вся грехи моя. Виждь враги моя, яко умножишася, и ненавидением неправедным возненавидеша мя. Сохрани душу мою, и избави мя, да не постыжуся, яко уповах на Тя. Незлобивии и правии прилеплюхуся мне, яко потерпех Тя Господи. Избави Боже, Израиля от всех скорбей его.

Псалом 30:

На Тя Господи уповах, да не постыжуся во век, правдою Твоею избави мя, и изми мя. Приклони ко мне ухо Твое, ускори изъяти мя. буди ми в Бога Защитителя, и в дом прибежища, еже спасти мя. Яко Держава моя, и Прибежище мое еси Ты: и Имене Твоего ради наставиши мя, и препитаеши мя. Изведеши мя от сети сея, юже скрыша ми: яко Ты еси Защититель мой Господи. В руке Твои предложу дух мой: избавил мя еси Господи Боже истины. Возненавидел еси хранящая суеты вотще: аз же на Господа уповах. Возрадуюся и возвеселюся о милости Твоей, яко призрел еси на смирение мое, спасл еси от нужд душу мою. И неси мене затворил в руках вражиих, поставил еси на пространне нозе мои. Помилуй мя Господи, яко скорблю, смятесе яростию око мое, душа моя и утроба моя. Яко исчезе в болезни живот мой, и лета моя в въздыханиих: изнеможе нищетою крепость моя, и кости моя смятошася. от всех враг моих бых поношение, и соседом моим зело, и страх знаемым моим: видящии мя вон бежаша от мене. Забвен бых яко мертв от сердца, бых яко сосуд погублен. Яко слышаша гаждение многих живущих окрест: вегда собратися им вкупе на мя, прияти душу

мою совещаща. Аз же на Тя Господи уповах, рех: Ты еси Бог мой. В руку Твоею жребии мои, избави мя из руки враг моих, и от гонящих мя. Просвети лице Твое на раба Твоего, спаси мя милостию Твоею. Господи, да не постыжуся, яко призвах Тя, да постыдятся нечестивии, и снидут во ад. Немы да будут устны льстивыя, глаголющия на праведнаго беззаконие, гордынею и уничижением. Коль многое множество благодати Твоея Господи, юже скрыл еси боящимся Тебе, соделал еси уповающим на Тя, пред сыны человеческими. Скрыеши их в тайне лица Твоего от мятежа человеческого: покроеши их в крове от пререкания язык. Благословен Господь, яко удиви милость Свою во граде ограждения. Аз же рех во изступлении моем, отвержен есмь от лица очию Твоею: сего ради услышал еси глас молитвы моея, внегда возвах к Тебе. Возлюбите Господа вси преподобнии его, яко истины взыскает Господь и воздает излише творящим гордыню. Мужайтесь, и да крепится сердце ваше, вси уповающи на Господа.

Псалом 90:

Живый в помощи Вышняго, в крове Бога Небеснаго водворится. Речет Господеви: Заступник мой еси, и Прибежище мое, Бог мой, и уповаю на Него. Яко Той избавит тя от сети ловчи, и от словесе мятежна. Плещма Своима осенит тя, и под криле Его надеешься. Оружием обыдет тя истина Его, не убоишия от страха ночнаго, от стрелы летящия во дни, от вещи во тьме преходящия, от сряща и беса полуденнаго. Падет от страны твоея тысяща, и тьма одесную тебе, к тебе же не приблизится. Обаче очима твоима смотриши, и воздаяние грешников узриши. Яко Ты Господи, Упование мое, Вышняго положил еси прибежище твое. Не приидет к тебе зло, и рана не приблизится телеси твоему. Яко ангелом Своим заповесть о Тебе, сохранить тя во всех путех твоих. На руках возмут тя, да не когда преткнеши о камень ногу твою. На аспида и василиска наступиши, и попереши льва и змия. Яко на Мя упова, и избавлю и: покрью и, яко позна Имя Мое: Воззовет ко Мне, и услышу его: с ним есмь в скорби, изму его: и прославлю его: Долготою дней исполню его, и явлю ему спасение Мое.

Слава, и ныне:

Аллилуиа, аллилуиа, аллилуиа, слава Тебе Боже. Трижды.

Господи помилуй, трижды.

Слава, и ныне:

С нами Бог, разумеите языцы, и покаряйтесь: яко с нами Бог.

Услышите до последних земли:

Яко с нами Бог:

Могущии покаряйтесь:

Яко с нами Бог:

Аще бо паки возможете, и паки побеждени будете:

Яко с нами Бог:

И иже аще совет совещаеете, разорит Господь:

Яко с нами Бог:

И слово, еже аще возглаголете, не пребудет в вас:

Яко с нами Бог:

Страха же вашего не убоимся, ниже смутимся:.

Яко с нами Бог:

Господа же Бога нашего Того освятим, и Той будет нам в страх:

Яко с нами Бог:

И аще на Него надеяся буду, будет мне во освящение:

Яко с нами Бог:

И уповая буду на Него, и спасуся Им:

Яко с нами Бог:

Се аз и дети, яже ми даде Бог:

Яко с нами Бог:

Людие ходящие во тьме, видеша свет велий:

Яко с нами Бог:

Живущии во стране и сени смертней, свет возсияет на вы:

Яко с нами Бог:

Яко Отроча родися нам, Сын, и дадеша нам:

Яко с нами Бог:

Егоже начальство бысть на раме Его:

Яко с нами Бог:

И мира Его несть предела:

Яко с нами Бог:

И нарицается Имя Его, Велика Совета Ангел:

Яко с нами Бог:

Чуден Советник:

Яко с нами Бог:

Бог крепок, Властитель, Начальник мира:

Яко с нами Бог:

Отец будущего века:

С нами Бог, разумеите языцы, и покаряйтеся: яко с нами Бог.

Слава: И ныне: С нами Бог:

Таже вкупе: Яко с нами Бог.

И абие настояция тропари во глас 6.

Слава, и ныне:

День прешед, песнословлю Тя Святый, / вечер, прошу, с ношию / ненаветен подаждь ми Спасе, / и спаси мя.

Безплотное естество херувимское, / немолчными песньми Тя славословят. / Шестокрильная животная серафими, / непрестанными гласы Тя превозносят: / ангелов же вся воинства / трисвятыми песньми Тя восхваляют. / Прежде бо всех еси Сый Отец, / и собезначальна имаши Твоего Сына: / и равночестна носай Духа жизни, / Троицы являеши нераздельное.

Пресвятая Дево Мати Божия, / и иже Слова самовидцы и слуги: / пророк же и мученик вси лица, / яко безсмертну имуще жизнь: / о всех молитесь прилежно, / яко вси есмы в бедах. / Да прелести избавльшеся лукаваго, / ангельскую вопием песнь: / Святый, Святый, Святый, Трисвятый Господи, / помилуй и спаси нас, аминь.

И абие низким гласом:

Верую во Единого Бога Отца Вседержителя, Творца небу и земли, видимым же всем и невидимым. ²И во Единого Господа Иисуса Христа, Сына Божия, Единородного, Иже от Отца Рожdenного прежде всех век. Света от Света, Бога Истинна, от Бога Истинна, рожденна, не сотворенна, единосущна Отцу, Имже вся быша. ³Нас ради человек, и нашего ради спасения сшедшаго с небес, и воплотившагося от Духа Свята и Марии Девы, и вочеловечшася. ⁴Распятаго же за ны при Понтийстем Пилате, и страдавша, и погребена. ⁵И воскресшаго в третий день, по Писанием. ⁶И возшедшаго на небеса, и седяща одесную Отца. ⁷И паки грядущаго со славою судити живым и мертвым, Егоже Царствию не будет конца. ⁸И в Духа Святаго, Господа Животворящаго, Иже от Отца Исходящаго, Иже со Отцем и Сыном Спокляема и Сславима, глаголавшаго пророки. ⁹Во едину святую, соборную и апостольскую Церковь. ¹⁰Исповедую едино крещение, во оставление грехов. ¹¹Чаю воскресения мертвых: ¹²И жизни будущаго века, аминь.

И абие, Пресвятая: вся глаголются по дважды, кроме Пресвятая Владычице, еже глаголется трижды:

Пресвятая Владычице Богородице, моли о нас грешных. (3)

Вся небесныя силы святых ангел и архангел молити о нас грешных. (2)

Святый Иоанне пророче, и Предтече, и Крестителю Господа нашего Иисуса Христа, моли о нас грешных. (2)

Святии славнии апостоли, пророцы и мученицы, и вси святии, молити о нас грешных. (2)

Преподобнии и богоноснии отцы наши, пастырие и учителяе вселенныя, молити о нас грешных. (2)

Зде же глаголется и святой храма. (2)

Непобедимая, и непостижимая, и Божественная Сило Честнаго и Животворящаго Креста, не остави нас грешных. (2)

Боже, очисти нас грешных. (2)

Боже, очисти нас грешных, и помилуй нас. (2)

Трисвятое. Пресвятая Троице: Отче наш:

И поем тропари сия во глас 1

Во Иордане крещающуся Тебе Господи, / Троическое явися поклонение: / Родителей бо глас свидетельствоваше Тебе, / возлюбленнаго Тя Сына именуя: / и Дух в виде голубине, / извествоваше словесе утверждение, / явлейся Христе Боже, / и мир просвещей слава Тебе.

Господи помилуй, 40.

Слава, и ныне:

Честнейшую херувим:

Именем Господним благослови, отче.

Молитвами святых отец наших:

Аминь.

И молитву сию Великаго Василия:

Господи Господи, избавлей нас от всякия стрелы летящая во дни, избави нас и от всякия вещи во тьме преходящая. Приими жертву вечернюю рук наших воздеяние. Сподоби же нас и ночное поприще без порока прейти, неискушены от злых. И избави нас от всякаго смущения и боязни, яже от диавола нам прибывающия. Даруй душам нашим умиление, и помыслом нашим попечение, еже на страшнем и праведнем Твоем суде испытания. Пригвозди страху Твоему плоти наша, и умертви уды наша сущия на земли: да и сонным безмолвием просветимся зрением судеб Твоих. Отими же от нас всякое мечтание неподобное, и похоть вредну. Возстави же нас во время молитвы, утверждены в вере, и преспевающия в заповедех Твоих, благоволением, и благодтию Единороднаго Сына Твоего: с Нимже благословен еси, с Пресвятым, и Благим, и Животворящим Твоим Духом, ныне и присно, и во веки веков, аминь.

И абие:

Приидите, поклонимся: **трижды. И поклоны 3.**

Псалом 50:

Помилуй мя Боже, по велицей милости Твоей и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе единому согреших, и лукавое пред Тобою сотворих, яко да оправдишися во словесех Твоих, и победиши, внегда судити Ти. Се бо в беззакониих зачат есмь, и во гресех роди мя мати моя. Се бо истину возлюбил еси, безвестная и тайная

премудрости Твоея явил ми еси. Окропиши мя иссопом, и очишуся: омыеши мя, и паче снега убелюся. Слуху моему даси радость и веселие, возрадуются кости смиренные. Отврати лице Твое от грех моих, и вся беззакония моя очисти. Сердце чисто созижди во мне Боже, и дух прав обнови во утробе моей. Не отвержи мене от лица Твоего, и Духа Твоего Святаго не отими от мене. Воздаждь ми радость спасения Твоего, и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен: сердце сокрушенно и смиренно Бог не уничижит. Ублажи Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая: тогда возложат на олтарь Твой тельцы.

Псалом 101:

Господи, услыши молитву мою, и вопль мой к Тебе да придет. Не отврати лица Твоего от мене: воньже аще день скорблю, приклони ко мне ухо Твое: воньже аще день призову Тя, скоро услыши мя. Яко исчезоша яко дым дние мои, и кости моя яко сушило сохосаша. Узавен бых яко трава, и исше сердце мое, яко забых снести хлеб мой. От гласа въздыхания моего, прильпе кость моя плоти моей. Уподобихся неясоти пустынной, бых яко ночный вран на нырищи. Бдех, и бых яко птица, особящаяся на зде. Весь день поношаху ми врази мои, и хвлящии мя мною кленяхуся. Зане пепел яко хлеб ядох, и питье мое с плачем растворях. От лица гнева Твоего и ярости Твоея, яко вознес низвергл мя еси. Дние мои яко сень уклонишася, и аз яко сено иссох. Ты же Господи, во век пребываеши, и память Твоя в род и род. Ты воскрес ущедриши Сиона: яко время ущедрити его, яко прииде время. Яко благоволиша раби Твои камение его, и персть его ущедрят. И убоятся языцы Имене Господня, и вси царие земстии славы Твоея. Яко созиждет Господь Сиона, и явится во славе Своей. Призре на молитву смиренных, и не уничижи моления их. Да напишется сие в род ин, и людие зиждемии восхвалят Господа. Яко приниче с высоты святыя Своея, Господь с небесе на землю призре: услышати въздыхание окованных, разрешити сыны умерщвленных: Возвестити в Сионе Имя Господне, и хвалу Его во Иерусалиме. Внегда собратися людем вкупе, и царем еже работати Господеви. Отвеща ему на пути крепости его, умаление дней моих возвести ми. Не возведи мене в преполовение дней моих, в роде родов лета Твоя. В началех Ты Господи, землю основал еси, и дела руку Твоею суть небеса. Та погибнут, Ты же пребываеши: и вся яко риза обетшают, и яко одежду свиеши я, и изменятся. Ты же тойжде еси, и лета Твоя не оскудеют. Сынове раб Твоих вселятся, и семя их во век исправится.

Молитва Манассии царя Иудейска:

Господи Вседержителю, Боже отец наших, Авраамов, и Исааков, и Иаковль, и семене их праведнаго: сотворивый небо и землю со всею лепотою их, связавый море словом повеления Твоего, заключивый бездну, и запечатствовавый ю страшным и славным именем Твоим, егоже вся боятся, и трепещут от лица силы

Твоя яко непостоянно великолепие славы Твоя, и не стерпимъ гнев, еже на грешники прещения Твоего. Безмерна же и неизследованна милость обещания Твоего: Ты бо еси Господь Вышний, благоутробен. долготерпелив и многомилостив, и кайся о злобах человеческих. Ты Господи, по множеству благости Твоя, обещал еси покаяние и оставление согрешившим Тебе, и множеством щедрот Твоих, определил еси покаяние грешником во спасение. Ты убо Господи Боже сил, не положил еси покаяние праведным, Аврааму и Исааку и Иакову, не согрешившим Тебе. Но положил еси покаяние на мне грешнем: зане согреших паче числа песка морского. Умножишася беззакония моя, Господи, умножишася беззакония моя: и не смь достоин воззрети, и видети высоту небесную от множества неправд моих. Слячен есмь многими узами железными, во еже не возвести главы моея, и несть ми ослабления: зане прогневах ярость Твою, и лукавое пред Тобою сотворих, не сотворивый воли Твоя, и не сохранивый повелений Твоих. И ныне приклоняю колена сердца, требуя от Тебе благости: согреших Господи, согреших, и беззакония моя аз вем: но прошу моляся, ослаби ми Господи, ослаби ми, и не погуби мене со беззаконьми моими. Ниже в век враждовав соблюдеши зол моих, ниже осудиши мя в преисподних земли. Зане Ты еси Боже, Бог кающихся, и на мне явиши всю благодать Твою, яко недостойна суща спасеши мя, по мнозей милости Твоей, и восхваляю Тя выну во днех живота моего: яко Тя поет вся сила небесная, и Твоя есть слава во веки веков, аминь.

Трисвятое. Поклоны три. Пресвятая Троице: Отче наш:

Кондак, глас 4.

Явился еси днесь вселенней, / и свет Твой Господи знаменася на нас, / в разуме поющих Тя: / пришел еси и явился еси, / Свет Непрístupный.

Господи помилуй, **40.**

Слава, и ныне:

Честнейшую херувим:

Именем Господним благослови, отче.

Молитвами святых отец наших:

Аминь.

И молитву: Владыко Боже Отче Вседержителю, Господи, Сыне Единородный Иисусе Христе, и Святыи Душе, Едино Божество, Едина Сила, помилуй мя грешнаго: и имиже веси судьбами, спаси мя недостойнаго раба Твоего, яко благословен еси во веки веков, аминь.

Приидите, поклонимся: трижды.

Псалом 69:

Боже, в помощь мою вонми, Господи, помощи ми потщися. Да постыдятся и посрамятся ищущии душу мою. Да возвратятся вспять, и постыдятся хотящии ми

злая. Да возвратятся абие стыдящися, глаголющии ми: благоже, благоже. Да возрадуются и возвеселятся о Тебе вси ищущии Тебе Боже: и да глаголют выну, да возвеличится Господь, любящии спасение Твое. Аз же нищ есмь и убог, Боже помози ми: Помощник мой, и Избавитель мой еси Ты, Господи не закосни.

Псалом 142:

Господи, услыши молитву мою, внуши моление мое во истине Твоей, услыши мя в правде Твоей: И не вниди в суд с рабом Твоим, яко не оправдится пред Тобою всяк живой. Яко погна враг душу мою, смирил есть в землю живот мой: Посадил мя есть в темных, яко мертвья века. И уны во мне дух мой, во мне смятятся сердце мое. Помянух дни древния, поучихся во всех делех Твоих, в творениях руку Твоею поучахся. Воздох к Тебе руце мои: душа моя яко земля безводная Тебе. Скоро услыши мя Господи, исчезе дух мой: не отврати лица Твоего от мене, и уподоблюся низходящим в ров. Слышану сотвори мне завтра милость Твою, яко на Тя уповах. Скажи мне Господи путь, вонже пойду, яко к Тебе взях душу мою. Изми мя от враг моих, Господи к Тебе прибегах, научи мя творити волю Твою, яко Ты еси Бог мой. Дух Твой Благий наставит мя на землю праву. Имене Твоего ради Господи, живиши мя, правдою Твоею изведеши от печали душу мою: И милостию Твоею потребиши враги моя, и погубиши вся стужающия души моей, яко аз раб Твой есмь.

Слава в вышних Богу, и на земли мир, в человецех благоволение. Хвалим Тя, благословим Тя, кланяем Ти ся, славословим Тя, благодарим Тя, великия ради славы Твоея. Господи Царю Небесный, Боже Отче Вседержителю, Господи Сыне Единородный Иисусе Христе, и Святыи Душе: Господи Боже, Агнче Божий, Сыне Отець, вземляй грех мiра, помилуй нас: вземляй грехи мiра, прими молитву нашу, седяи одесную Отца, помилуй нас. Яко Ты еси Един Свят, Ты еси Един Господь, Иисус Христос, в славу Бога Отца, аминь.

На всяку ночь благословлю Тя, и восхваляю Имя Твое во веки, и в век века.

Господи, прибежище был еси нам в род и род. Аз рех: Господи, помилуй мя, исцели душу мою, яко согреших Тебе. Господи, к Тебе прибегах, научи мя творити волю Твою, яко Ты еси Бог мой: яко у Тебе источник живота, во свете Твоем узрим свет. Пробави милость Твою ведущим Тя.

Сподоби Господи в ночь сию без греха сохранитися нам. Благословен еси Господи, Боже отец наших, и хвално, и прославлено Имя Твое во веки, аминь.

Буди Господи, милость Твоя на нас, якоже уповахом на Тя. Благословен еси Господи, научи мя оправданием Твоим. Благословен еси Владыко, вразуми мя оправданием Твоим. благословен еси Святыи, просвети мя оправданием Твоим. Господи, милость Твоя во век, дел руку Твоею не презри. Тебе подобает хвала, Тебе подобает пение, Тебе слава подобает, Отцу, и Сыну, и Святому Духу, ныне и присно и во веки веков, аминь.

По Слава в вышних: **исходим в притвор, И поем на литии стихиры самогласны, глас 4.**

[Космы монаха:]

Одевайся светом яко ризою, / нас ради по нам быти сподобился есть, / во струи одевается днесь Иорданския: / не Сам сих ко очищению требуя, / но нам Собою устрояяй порождение. / О чудесе! без огня изваряет, / и назидает без сокрушения, / и спасает в Него просвещаемыя, / Христос Бог и Спас душ наших.

Тебе в Дусе и огни очищающа грех мира, / зря Креститель грядуща к себе, / ужасаяся и трепеща, вопияше глаголя: / не смею держати верх Твой пречистый. / Ты мя освяти Владыко, / Божественным явлением Твоим, / Едине Человеколюбче.

Приидите подражаем мудрыя девы, / приидите срящим явльшагося Владыку: / яко прииде, яко Жених ко Иоанну. / Иордан видев Тя убояся и пожда, / Иоанн вопияше: / не смею держати верха Безсмертнаго. / Дух низхождаше в виде голубине освятити воды, и глас с небесе: / Сей есть Сын Мой, / пришедый в мир спасти род человеческий, / Господи слава Тебе.

Крещается Христос, / и восходит от воды совозводит бо с Собою мир, / и зрит разводящаяся небеса, / яже Адам затвори себе и сущим с ним. / И Дух свидетельствует Божество: / подобному бо предтчет и глас от Небесе: / отгуду бо свидетельствуемый / Спас душ наших.

Трепеташе рука Крестителява, / егда пречистому Твоему верху коснуса: / возвратися Иордан река вспять, / не дерзая служити Тебе: / яже бо устыдеса Иисуса Навина, / како Творца своего устрашитися не имяше? / Но все исполнил еси смотрение, Спасе наш, / да спасеши мир явлением Твоим, / Едине Человеколюбче.

Слава, глас 8:

[Иоанна монаха:] Господи, исполни хотя, / яже уставил еси от века, / от всея твари служители тайны Твоея приял еси: / от ангел Гавриила, от человек Деву, / от небес звезду, и от вод Иордан, / в немже беззаконие мирское потребил еси, / Спасе наш, слава Тебе.

И ныне, глас тойже:

[Анатолия:] Днесь всяка тварь просвещается, / днесь всяческая веселятся, / небесная вкупе и земная, / ангели и человецы смешаются: / идеже бо Царево пришествие, и чин приходит. / Тецем убо на Иордан, / и видим вси Иоанна, / како крещает верх нерукотворенный и безгрешный? / Темже апостольский глас припевающе, / согласно возопиим: / явися благодать Божия, спасительная всем человеком, / озаряющи и подающи верным велию милость.

На стиховне стихиры самогласны, глас 2.

[Анатолиево:]

На Иорданстей реце, видев Тя Иоанн к себе грядуща, глаголаше: / Христе Боже, / что к рабу пришел еси, / скверны не имый Господи? / Во имя же чие Тя крещу? / Отца? но Того носиши в Себе. / Сына? Но Сам еси воплотивыйся. / Духа Святаго? И Сего веси даяти верным усты: / явлейся Боже, помилуй нас.

Стих: Море виде и побеже, * Иордан возвратися вспять.

Видеша Тя воды Боже, / видеша Тя воды и убояшася: / к Твоей бо славе противозрети херувими не могут, / ниже взирати серафими, / но со страхом предстояще, / овии убо носят, овии же славят силу Твою. / С нимиже Щедре возвещаем хвалу Твою, глаголюще: / явлейся Боже, помилуй нас.

Стих: Что ти есть море, яко побегло еси? и тебе Иордане, * яко возвратился еси вспять?

Днесь небесе и земли Творец приходит плотию на Иордан, / крещения прося безгрешный, / да очистит мир от лести вражия: / и крещается от раба Владыка всяческих, / и очищение водою роду человеческому дарует. / Тому возопиим: / явлейся Боже наш, слава Тебе.

Слава, и ныне, глас 6:

[Феофаново:] Еже от Девы Солнце, / видя иже от неплодове светильник светлый, / во Иордане просяща крещения, / ужасом и радостию вопияше к Нему: / Ты мя освяти Владыко, / Божественным явлением Твоим.

Таже, Ныне отпускаеши: Трисвятое. И по Отче наш:

Тропарь праздника, глас 1:

Во Иордане крещающуся Тебе Господи, / Троическое явися поклонение: / Родителей бо глас свидетельствоваше Тебе, / возлюбленного Тя Сына именуя: / и Дух в виде голубине, / извествоваше словесе утверждение, / явлейся Христе Боже, / и мир просвещей слава Тебе. **[Трижды]**

И благословение хлебов по обычаю.

Таже, Буди имя Господне: **трижды, и псалом:** Благословлю Господа на всякое время: **До: Не** лишатся всякаго блага.

НА УТРЕНИ,

По чтении же и по шестопсалми, на Бог Господь: тропарь праздника, трижды: и обычные стихологии.

По 1_й стихологии седален, глас 3.

Подобен: Красоте:

Явльшуся Тебе во Иордане Спасе, / и крещшуся Тебе от Предтечи Христе, / Возлюбленный Сын свидетельствован был еси: / темже и Собезначален Отцу явился еси. / Дух же Святой на Тя сходяше, / Имже и просветившеся вопием: / славу Богу Сущему в Троице.

Слава, и ныне, глас 4.

Подобен: Скоро предвари:

Струи освятил еси Иорданския, / державу сокрушил еси греховную, Христе Боже наш: / приклонил еси длани Себе Предтечеве, / и спасл еси от лести человеческий род. / Темже Тя молим: / спаси души наша.

По 2_й стихологии седален, глас 5.

Подобен: Собезначальное Слово:

Иорданскими струями обложься, / Иже светом преславно одевайся, / в нихже Адамово естество обновил еси, / сокрушшееся злым преслушанием, / Слове Божий. / Темже Тя восхваляем, / и святое Твое вси славословим явление.

Слава, и ныне, глас 4.

Подобен: Удивися Иосиф:

Иордане реко, что удивился еси, / зря Невидимаго нага? / видех и вострепетах рече, / и како бо сего не хотех устрашиться и зайти? / ангели Его устрашишася зряще, / ужасеся небо, и земля вострепета, / и смятеся море, и вся видимая и невидимая: / Христос явился на Иордане освятити воды.

По полиелеи седален, глас 4:

Подобен: Удивися Иосиф:

Приидите увидим вернии, / где крестися Христос. / Да последуем прочее, ко Иордану реце, / ко гласу вопиющего в пустыни, / и увидим тамо Содетеля Адамова, / дланию рабскою рукополагаема за благоутробие неизреченное, / и к Нему велегласно возопиим: / пришел еси. и явился еси во Иордане освятити воды.

Слава, и ныне, тойже.

Приидите увидим вернии, / где крестися Христос. / Да последуем прочее, ко Иордану реце, / ко гласу вопиющего в пустыни, / и увидим тамо Содетеля Адамова, / дланию рабскою рукополагаема за благоутробие неизреченное, / и к Нему велегласно возопиим: / пришел еси. и явился еси во Иордане освятити воды.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящий Сиона, / посрамится от Господа, / яко трава бо огнем / будете изсохше.

Слава и ныне: / Святым Духом / всяка душа живится, / и чистотою возвышается, / светлеется Троическим Единством священнотайне.

Прокимен, глас 4:

Прокимен: Море виде и побеже, * Иордан возвратися вспять.

Стих: Что ти есть море, яко побегло еси; и тебе Иордане, яко возвратился еси вспять;

Всякое дыхание:

Евангелие от Марка, зачало 2 [Мк. 1, 9 – 11.]

И вѣсть во днѣхъ ѡнѣхъ, прїиде иѣсъ ѿ назарѣта галїлїйскаго и крѣтиса ѿ іуанна во іорданѣ. **И** ѡбїе восходѣ ѿ воды, видѣ разводѣцася небеса и дѣа ѡкво гобѣа, сходѣца на нь. **И** гла сѣ вѣсть сѣ небесѣ: ты еси снѣ мой возлюбленный, ѡ немиже бѣговолїхъ.

По 50_м псалме Слава, глас 2:

Всяческая днесь да возрадуются, / Христу явльшуся во Иордане.

И ныне: тойже.

Всяческая днесь да возрадуются, / Христу явльшуся во Иордане.

Таже стихира самогласна, глас 6:

Бог Слово явися плотию роду человеческому, / стояше креститися во Иордане, / и глаголаше к Нему Предтеча: / како простру руку, / и прикоснуся верху Держащаго всяческая; / аще и от Марии еси Младенец, / но вем Тя Бога Превечнаго: / по земли ходиши певаемый от серафим, / и раб Владыку крещати не научихся. / Непостижиме Господи, слава Тебе.

Канона два: ирмосы обою канонов по дважды, тропари на 12. Последи же первый лик перваго канона ирмос: второй лик 2_го канона ирмос.

Канон первый, творение кир Космы монаха, егоже краестрочие: Крещение очищение земнородных грехов.

Глас 2.

Песнь 1.

Ирмос: Глубины открыл есть дно, / и сушею своя влечет, / в ней покрыв противныя, / крепкий во бранех Господь, / яко прославися.

Адама истлевшаго обновляет струями Иорданскими: и змиев главы гнездящихся сокрушает Царь веков Господь, яко прославися.

Огнем Божества невестственным, в плоть вещественну одеаяся, Иорданскою облагается водою, воплощется от Девы Господь, яко прославися.

Скверну омываяй человек, сим очистишься во Иордане, имже восхотев уподобися, еже бе пребыв, сущыя во тьме просвещаяй Господь, яко прославися.

Ин канон, творение Иоанна Дамаскина, глас тойже.

Ирмос: Шествует морскую волнящуюся бурю, / сушу абие Израиль явльшуюся: / чермный же понт тристаты египетския покры купно, / водостланен гроб, / силою крепкою десницы Владычни.

Утру явльшуся человеком светоносна, ныне из пустыни к водам Иорданским, Царю преклонил еси солнца Твою выю, лика мрачна родоначальника исхитити, скверны же всякия очистити тварь.

Безначальне струям спогребшася Тебе Слове, новаго преводиши истлевшаго лестию: сего несказанно от Отца прием глас державен: Сей Возлюбленный, равен же Мне Отрок естеством.

Катавасия: Шествует морскую волнящуюся бурю, / сушу абие Израиль явльшуюся: / чермный же понт тристаты египетския покры купно, / водостланен гроб, / силою крепкою десницы Владычни.

Песнь 3.

Ирмос: Крепость даяй царем нашим Господь, / и рог помазанных Своих возносяй, / от Девы раждается, грядет же ко крещению. / Тому вернии возопием: / несть свят, яко Бог наш.

Неплодная древле и безчадная люте, днесь веселися Христова Церковь, водою бо и Духом сынове Тебе родишася, верою взывающе: несть свят, якоже Бог наш.

Велиим гласом в пустыни вопиет Предтеча: Христу уготовайте пути, и стези Богу нашему правы соделайте, верою взывающе: несть свят, якоже Бог наш.

Ин.

Ирмос: Елицы древних изрешихомся сетей, / брашен львов сотренных членовными, / радуимся и разширим уста, / слово плетуще от словес сладкопения, / имже к нам наслаждаетея дарований.

Умерщвление первее насадивый твари, зверя злодейственного вообразься в естество, омрачается плотским пришествием: утру явльшуся приразився Владыце, сокрушити свою враждебную главу.

Влечет к себе богозданное естество, утробы мучителя, погребенное пределы: раждается паки земнородных обновление, дело державно совершая Владыка: прииде бо, тое очистити хотя.

Ипакои, глас 5:

Егда явлением Твоим просветил еси всяческая, тогда сланое неверия море побеже, и Иордан доле текий возвратися, к небеси возвышая нас: но высоту Божественных заповедей Твоих соблюди Христе Боже, молитвами Богородицы и помилуй нас.

Катавасия: Елицы древних изрешихомся сетей, / брашен львов сотренных членовными, / радуимся и разширим уста, / слово плетуще от словес сладкопения, / имже к нам наслаждаетея дарований.

Песнь 4.

Ирмос: Услышах Господи глас Твой, егоже рекл еси, / глас вопиющаго в пустыни, / яко возгремел еси над водами многими, / Твоему свидетельствуяй Сыну, / весь быв сошедшаго Духа, возопи: / Ты еси Христос, / Божия Мудрость и Сила.

Очищаемо солнце кто виде, проповедник вопиет, пресветлое естеством? да Тебе водами сияние славы, Отца Образ Присносущнаго омыю, и сено сый Огню прикоснуса Твоего Божества: Ты бо еси Христос, Божия Мудрость и Сила.

Яви Божественное, еже име благоговение Моисей, прилучився Тебе: яко бо из купины Тя возгласивша разуме, абие отврати лице: аз же како Тя увижу ясно? или како руку положу на Тя? Ты бо еси Христос, Божия Мудрость и Сила.

Душевное совершая Мудре, и словом почтенный, бездушных стыждуся. Аще бо крещу Тя, клеветна ми есть огнем дымящаяся гора, побегшее же море надвое, и Иордан сей возвративыйся: Ты бо еси Христос, Божия Мудрость и Сила.

Ин.

Ирмос: Огнем очищся тайнаго зренья, / поя пророк человек новодейство, / возглашает глас, Духом плещущь, / воплощение являющь неизреченна Слова: / Имже сильных державы сотрошася.

Послан от Отца Всесветлое Слово, ноши отгнати зломрачное стремление, и искоренити грядеши человек грехи: сыны же привлещи Твоим Крещением Блаже, светлы от струй Иорданских.

Самое провидев Нареченное Слово, ясно проповедник вопиет твари: Сей прежде мене, второй плотию, сообразен просия Божественною силою, враждебный наш отъяти грех.

Пажить у Себе животворну нося, уловляет змиев гнездам натекая многими сетями, низлагая Бог Слово: запинает же уязвившаго всемирный род, сего потребль избавляет тварь.

Катавасия: Огнем очищся тайнаго зренья, / поя пророк человек новодейство, / возглашает глас, Духом плещущь, / воплощение являющь неизреченна Слова: / Имже сильных державы сотрошася.

Песнь 5.

Ирмос: Иисус живота Начальник, / разрешити осуждение грядет Адама первозданного, / очищение же яко Бог не требуя, / падшаго очищает во Иордане: / в немже вражду убив, преимуществ всяк ум мир дарует.

Сшедшымся без числа людем от Иоанна креститися, Сам посреде их ста, провозгласи же предстоящим: кто показа непокоривии, гнева вам уклонитися хотящаго быти; плоды достойны Христу сотворите, предстояй бо ныне мир дарует.

Делатель и Зиждитель посреде стояй, яко Един всех сердца испытует: очистительную же лопату рукою прием, всемирное гумно всеумудре разлучает, неплодие паля, благоплодным вечный живот дарует.

Ин.

Ирмос: Врага темнаго и оскверненнаго яда / очищением духа измовени, / к новой пристахом неблазненной стези, / вводящей в неприступную радость, / едином приступну, имже Бог примирился.

Видев Зиждитель во мраце прегрешений пленицами неизбежными, егоже вообрази персты, поставляет на обою раму воздвиг горе, ныне во многотекущих водах омывая студа древняго, Адамова злаго нрава.

Со благочестием притецем прилежно, ко источником пречистым, течения спасительнаго, Слова усмотряюще от Нетленныя, почерпала приносяще жажды Божественныя, мира сладостне исцеляя недуг.

Катавасия: Врага темнаго и оскверненнаго яда / очищением духа измовени, / к новой пристахом неблазненной стези, / вводящей в неприступную радость, / едином приступну, имже Бог примирился.

Песнь 6.

Ирмос: Глас словесе, светильник света, / денница солнца, / Предтеча в пустыни, / покайтеся всем вопиет людем и предочиститесь: / се бо предстоит Христос, / от тли мир избавляяй.

Рождся нетленно от Бога и Отца, от Девы кроме скверны воплощается Христос: Емуже ремень, яже от нас слова сочтания, разрешити неудобь учит Предтеча, земнородныя от лести избавляя.

Огнем крестит конечным Христос противныя, а не Бога мудрствующих Его: Духом же обновляет водою благодати, разумливья Божества его, от прегрешений избавляя.

Ин.

Ирмос: Вожденнаго явствова со всеблаженным гласом Отец, / Егоже из чрева отрыгну: / ей глаголет, Сей соестествен Сын сый светозарен, / произниче из чловеча рода: / Слово же Мое живо, и Человек промышленем.

От глубиннаго льва, тревечерний странне пророк во внутренних валяясь, абие произыде, пакибытия спасение от змия човекоубийцы, всем предявляя в последняя лета.

Отверсту небу всесветлых писаний, учение зрит от Отца Посылаемый: пребывающ же Дух на Пречистем Слове, нашед яко голубь неизреченным образом, людем же являет пришедшым ко Владыце.

Катавасиа: Вожденнаго явствова со всеблаженным гласом Отец, / Егоже из чрева отрыгну: / ей глаголет, Сей соестествен Сын сый светозарен, / произниче из чловеча рода: / Слово же Мое живо, и Человек промышленем.

Кондак, глас 4.

Явился еси днесь вселенней, / и свет Твой Господи знаменася на нас, / в разуме поющих Тя: / пришел еси и явился еси, / Свет Неприступный.

Икос:

Галилеи язычестей, Завулонстей стране и Неффалимстей земли, якоже рече пророк, Свет Велик возсия Христос. Омраченным светла явися Заря, из Вифлеема облистаящая, паче же из Марии Господь, всей вселенней возсиявает лучи, Солнце правды. Темже иже от Адама назии, приидите вси облечемся в Него, да согреемся: покрывает бо нагия, и просвещает темныя. Пришел еси и явился еси, Свет Неприступный.

Песнь 7.

Ирмос: Юноши благочестивыя печи огненной приобщившыся, / шумящ дух росный невредимы сохрани, / и Божия ангела снизхождение. / Темже в пламени орошаеми благодарственно воспеваху: / препетый отцев Господи и Боже, благословен еси.

Якоже на небеси с трепетом и чудом предстояху, во Иордане силы ангельския, смотряюще толика Божия схождения: яко Держай превышних вод состав, в водах Плотносец стояше, Бог отцев наших.

Облак древле и море Божественнаго проображаху крещения чудо, в нихже древнии крестишася, исходяще законнии людие. Море же бе образ воды, и облак Духа: имиже совершаеми, благословен еси зовем, Господи Боже во веки.

Вси вернии, в Немже совершение прияхом, благословяще немолчно со ангелы, прославим Отца и Сына и Духа Святаго: се бо Троица Ипостасьми Единосушная, Един же Бог, Емуже поем: благословен еси, Господи Боже во веки.

Ин.

Ирмос: Опали струею змиевы главы, / пещный высокий пламень, юноши носящ благочестивыя, / утишивый неудободержимую мглу из греха, / всю же омывает росую Духа.

Тебе живописующий ассирийский пламень, ужасен поставляеши, в росу праведен: темже вода ныне, якоже пламень одевая вредную злобу Христе, прикровенную опалает, от поползновенных стези призывающи.

Раздельшуся Иордану древле, по суху переходят людие израильстии, Тебе Державнейшаго, содержаща тварь некоснительне, ныне в водах написующии, к нетленной и полезней стези.

Вемы первее всепагубный потоп, милостивно Тя всех во тлю привести, о тревеликия сотворяя и странная! ныне же потопльша Христе грех, за благосердие и человеческое спасение.

Катавасия: Опали струею змиевы главы, / пещный высокий пламень, юноши носящ благочестивыя, / утишивый неудободержимую мглу из греха, / всю же омывает росую Духа.

Песнь 8.

Ирмос: Тайну преславную вавилонская показа пещь, / источившая росу, яко струями имяше невещественный огонь восприяти Иордан, / и объяти плотию крещаемая Зиждителя: / Егоже благословят людие, / и превозносят во вся веки.

Отложи страх весь, избавитель Предтечи рече, Мне же повинися яко Благому, Мне приступи, сие бо естеством бых. Моим повелением покорися, и крести Мя сошедшаго: Егоже благословят людие, и превозносят во вся веки.

Глаголы якоже услыша Креститель Владычни, с трепетом длань простирает: обаче же рукою коснувся верху Зиждителя своего, крещемуся вопияше: освяти мя, Ты бо еси Бог Мой. Егоже благословят людие, и превозносят во вся веки.

Троицы явление во Иордане бысть, самое бо Пребожественное Естество Отец возгласи: Сей Крещаемый Сын возлюбленный Мой: Дух же прииде к Подобному, Егоже благословят людие, и превозносят во вся веки.

Ин.

Ирмос: Свободна убо тварь познавается, / и сынове света прежде омраченнии: / един стенет тьмы предстатель. / Ныне да благословит усердно Виновнаго, / прежде окаянное языков всенаследие.

Трие боговиднии во огни орошаеми, озаряющесея тремя всесветле Святынями, яве показоваху превышнее естество смешением человеческим, огнепалящее росую милостивно всякую пагубную леть.

Да убелится всякое земное естество, от падения ныне на небо возводимо: имже бо вся соблюдаются Словом, текущими струями омывшеся, прегрешений прежних убеже, пресветло измовено.

Катавасия: Свободна убо тварь познавается, / и сынове света прежде омраченнии: / един стенет тьмы предстатель. / Ныне да благословит усердно Виновнаго, / прежде окаянное языков всенаследие.

На 9_й песни паки вжигают свечи братия. Честнейшую не поем, но поем припевы праздника:

Величай душе моя, Честнейшую горних воинств, Деву Пречистую Богородицу.

И ирмос: Недоумет всяк язык благохвалити по достоянию, / изумевает же ум и премірный пети Тя Богородице: / обаче Благая сущи, веру приими, / ибо любовь веси божественную нашу. / Ты бо христиан еси Предстательница, / Тя величаем.

Посем второй лик поет тойже припев и ирмос. И прочих шесть припевов припеваем на кийждо тропарь по единожды:

Величай душе моя, от Предтечи крещения просяща.

Величай душе моя, во Иордане пришедшаго креститися.

Давиде прииди духом к просвещенным: ныне приступите, пой к Богу верою глаголя: просветитесь, сей нищий воззва Адам в падении: ибо того услыша Господь, пришед струями Иорданскими, тленнаго же обнови.

Величай душе моя, от Отческаго гласа свидетельствованна.

Величай душе моя, Единаго от Троицы, преклоньшаго выю и крещение приемша.

Исаиа измыйтеса, очиститеса глаголет, лукавствия пред Господем оставите: жаждущии на воду живу идите: кропит бо водою обновляя Христос, приступающыя к Нему верою и к Животу нестареемому, крещает Духом.

Пророче прииди ко Мне, простри руку, и крести Мя скоро.

Пророче остави ныне, и крести Мя хотяща, исполнити бо приидох всяку правду.

Соблюдаемся благодатию вернии и печатию: яко бо губителя бежаша, прага евреи древле окровавлена: тако и нам исходное Божественное сие, пакибытия баня будет. Отсюду и Троицы узрим Свет Незаходимый.

Посем первый лик поет втораго канона припев: Днесь Владыка преклоняет выю под руку Предтечеву.

И ирмос: О паче ума Рождества Твоего чудес, / Невесто Всечистая, Мати Благословенная! / Еюже получивше всесовершенное спасение, / достойно хвалим, яко благодетеля, / дар носяще песнь благодарения.

И второй лик такожде поет припев и ирмос. И прочыя пять припевы: един дважды:

Днесь Иоанн крещает Владыку во струях Иорданских.

Днесь Владыка погребает водами человеческий грех.

Уведехом Моисею купиною явленная, гряди странными уставы соделанная: яко бо спасеся огонь носящи Дева, светоносна рождши Благодетеля, во Иорданских же струях явленна.

Днесь Владыка свыше свидетельствуется, Сын Возлюбленный.

Днесь Владыка прииде освятити естество водное.

Днесь Владыка крещение приемлет, рукою Предтечевою.

Помазуеши совершая человеческое существо, Царю Безначальне, Духа общением, струями чистыми отмыв: и тьмы крепость же посрамль возвышенную, ныне в безпрестаннем воздати житии.

Таже оба лика сошедшеся вкупе, поют первый припев праздника и ирмос: Недоумеет всяк язык: Посем втораго канона припев и ирмос: **О** паче ума: **И** поклон.

Катавасия 1: Недоумеет всяк язык благохвалити по достоянию, / изумевает же ум и премірный пети Тя Богородице: / обаче Благая сущи, веру прими, / ибо любовь веси божественную нашу. / Ты бо христиан еси Предстательница, / Тя величаем.

Катавасия 2: **О** паче ума Рождества Твоего чудес, / Невесто Всечистая, Мати Благословенная! / Еюже получивше всесовершенное спасение, / достойно хвалим, яко благодетеля, / дар носяще песнь благодарения.

Светилен:

Подобен: Посетил ны:

Явися Спас благодать и истина во струях Иорданских, и сущия во тьме и сени спящия просветил ест: ибо прииде, и явися Свет Неприступный.

На хвалитех стихиры на 4, глас 1: Германа патриарха:

Свет от Света, / возсия мірови Христос Спас наш, / явлейся Бог: / Сему людие поклонимся.

Како Тя Христе, / раби Владыку достойно почтим, / яко в водах всех нас / обновил еси?

Ты во Иордане крещься Спасе наш, / воды освятил еси, дланию раба рукополагаемый, / и страсти міра исцеляяй, / велие таинство явления твоего. / Человеколюбче Господи, слава Тебе.

Истинный Свет явися, / и всем просвещение дарует. / Крещается Христос с нами, / Иже всякия вышши чистоты. / Влагает священие воде, / и душам сие очищение бывает, / земное являемое, и выше небес разумеваемое. / Банею спасение, водою же Дух: / погружения ради, иже к Богу наш восход бывает. / Чудесна дела Твоя Господи, слава Тебе.

Слава, глас 6. Анатолия:

Водами Иорданскими / одеялся еси Спасе, / одеяйся светом яко ризою: / и приклонил еси главу Предтечи, / Иже небо измеривый пядию, / да обратиши мир от лести, / и спасеши яко Человеколюбец.

И ныне, глас 2. Тогожде:

Днесь Христос на Иордан прииде креститься: / Днесь Иоанн касается верху Владычню. / Силы небесныя ужасошася, / преславное видящи таинство: / море виде и побеже: / Иордан виде возвратися. / Мы же просвещшеся вопием: / слава явившемуся Богу, / и на земли Виденному, / и Просветившему мир.

Славословие великое. По трисвятом тропарь праздника. Ектении, и отпуст. И дается святыи елей от кандила, поющим нам стихирю праздника. Таже час 1. На 1_м часе тропарь праздника. По трисвятом кондак праздника: и прочее, и совершенный отпуст. В сий день литургия бывает порану, труда ради бденнаго.

НА ЛИТУРГИИ:

Поем антифоны праздника.

Антифон 1

Стих 1: Во исходе Израилеве от Египта, дому Иаковля из людей варвар.

Припев: Молитвами Богородицы, Спасе, спаси нас.

Стих 2: Бысть Иудея святыня Его, Израиль область Его.

Припев: Молитвами Богородицы, Спасе, спаси нас.

Стих 3: Море виде и побеже, Иордан возвратися вспять.

Припев: Молитвами Богородицы, Спасе, спаси нас.

Стих 4: Что ти есть, море, яко побегло еси? И тебе, Иордане, яко возвратился еси
вспять?

Припев: Молитвами Богородицы, Спасе, спаси нас.

Слава, и ныне:

Припев: Молитвами Богородицы, Спасе, спаси нас.

Антифон 2

Стих 1: Возлюбих, яко услышит Господь глас моления моего.

Припев: Спаси ны, Сыне Божий, / во Иордане крестивыйся, поющия Ти: /
Аллилуиа.

Стих 2: Яко приклони ухо свое мне, и во дни моя призову.

Припев: Спаси ны, Сыне Божий, / во Иордане крестивыйся, поющия Ти: /
Аллилуиа.

Стих 3: Объяша мя болезни смертныя, беды адовы обретоша мя.

Припев: Спаси ны, Сыне Божий, / во Иордане крестивыйся, поющия Ти: /
Аллилуиа.

Стих 4: Милостив Господь и праведен, и Бог наш милует.

Припев: Спаси ны, Сыне Божий, / во Иордане крестивыйся, поющия Ти: /
Аллилуиа.

Слава, и ныне: Единородный Сыне:

Антифон 3

Стих 1: Исповедайтесь Господеву, яко Благ, яко в век милость Его.

Тропарь: Во Иордане крещающуся Тебе Господи, / Троическое явися
поклонение: / Родителей бо глас свидетельствоваше Тебе, / возлюбленного Тя
Сына именуя: / и Дух в виде голубине, / извествоваше словесе утверждение, /
явлейся Христе Боже, / и мир просвещей слава Тебе.

Стих 2: Да речет убо до Израилев: яко Благ, яко в век милость Его.

Тропарь: Во Иордане крещающуся Тебе, Господи:

Стих 3: Да речет убо дом Ааронъ: яко Благ, яко в век милость Его.

Тропарь: Во Иордане крещающуся Тебе, Господи:

Стих 4: Да рекут убо вси, боящиися Господа: яко Благ, яко в век милость Его.

Тропарь: Во Иордане крещающуся Тебе, Господи:

По входе же Евангелиа, священник входный стих:

Входное: Благословен Грядый во Имя Господне, благословихом вы из дому Господня, Бог Господь и явися нам.

И тропарь праздника, глас 1:

Во Иордане крещающуся Тебе Господи, / Троическое явися поклонение: / Родителей бо глас свидетельствоваше Тебе, / возлюбленнаго Тя Сына именуя: / и Дух в виде голубине, / извествоваше словесе утверждение, / явлейся Христе Боже, / и мир просвещей слава Тебе.

Слава, и ныне:

Кондак, глас 4.

Явился еси днесь вселенней, / и свет Твой Господи знаменася на нас, / в разуме поющих Тя: / пришел еси и явился еси, / Свет Неприступный.

Вместо же Трисвятаго поем: Елицы во Христа креститесь:

Прокимен, глас 4:

Прокимен: Благословен Грядый во Имя Господне, * Бог Господь и явися нам.

Стих: Исповедайтесь Господеву яко Благ, яко в век милость его:

Апостол к Титу, зачало 302:

Чаде Титѣ: Явѣся во вѣтъ вѣѣ спсїтельнаа всѣмъ челоѣкѣмъ, наказѣючи насъ, да ѡвѣргшемъ нечестїа и мїрскїхъ похотей, цѣлоуѣреннѣ и праведнѣ и бѣгочестнѣ поживемъ въ нынѣшнемъ вѣцѣ, ждѣще бѣженнаго оупованїа и явленїа славы великаго бѣга и спса нашего їиса хрїста, ѣже далъ єсть себѣ за ны, да избавитъ ны ѡ всѣкаго везаконїа и ѡчїтитъ себѣ люди извѣранны, ревнїтели дѣбрыми дѣлаѣми.

Аллилуиа, глас 4: Принесите Господеву Сынове Божии:

Стих: Глас Господень на водах:

Евангелие Матфея, зачало 6:

Тогда приходитъ иисъ ѿ галиіи на іорданъ ко іоаннѣ крѣтитисѧ ѿ него̀. Іоаннъ же возбранѧше є̀мѣ, глагола: ѧзъ трѣбѡю тобою крѣтитисѧ, и ты ли грядѣши ко мнѣ; **Ѿ**вѣщавъ же иисъ рече къ немѣ: ѡстави нѣѣ: такѡ бо подобаетъ намъ исполнити всѧкъ правдѣ. **Т**огда ѡстави є̀го. **И** крѣтивсѧ иисъ взыде ѧвѣѣ ѿ воды: и сѣ, ѿверзѡшасѧ є̀мѣ небеса̀, и видѣ дѧа бжїѧ сходѧща ѧкѡ голѡва и грядѧща на него̀. **И** сѣ, гласъ съ небесѐ глѧ: сѣй є̀сть снъ мой возлюбленный, ѡ немѣже бжговолихъ.

Причастен: Явися благодать Божия спасительная всемъ человекомъ.

На трапезе бываетъ утешение братии велие. Ядимъ рыбу, и сыр и яйца, и пиемъ вино: мирстии же мясо, аще будетъ и в среду или пятокъ. И четется слово Златоустаго, емуже начало: **В**си вы во благодушии.